

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков. Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 4. *Господи, воззвах к Тебе, услыши мя.*

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры

Стих: Изведи из темницы душу мою, исповедатися имени Твоему.

Животворящему Твоему Кресту, непрестанно кланяющемся, Христе Боже, тридневное Воскресение Твое славим: тем бо обновил еси истлевшее человеческое естество, Всесильне, и иже на Небеса восход обновил еси нам, яко Един Благ и Человеколюбец.

Стих: Мене ждут праведницы, дондеже воздаси мне.

Древа преслушания запрещение разрешил еси, Спасе, на Древе Крестнем волею пригвоздився, и во ад сошед, Сильне, смертныя узы, яко Бог, растерзал еси. Темже кланяемся еже из мертвых Твоему Воскресению, радостию вопиюще: Всесильне Господи, слава Тебе.

Стих: Из глубины воззвах к Тебе Господи, Господи, услыши глас мой.

Врата ада сокрушил еси, Господи, и Твоею смертию смертное царство разрушил еси: род же человеческий от истления свободил еси, живот и нетление миру даровав, и велию милость.

Стих: Да будут уши Твои, внемлюще гласу моления моего.

Приидите, воспоим людие, Спасово тридневное востание, имже избавихомся адовых нерешимых уз; и нетление и жизнь вси восприяхом зовуще: Распныйся, и Погребыйся, и Воскресый, спаси ны Воскресением Твоим, Едине Человеколюбче.

Стих: Аще беззакония назириши Господи, Господи, кто постоит Яко у Тебе очищение есть.

Ангели и человецы, Спасе, Твое поют тридневное востание, имже озаришася все-ленные концы, и работы вражия вси избавихомся, зовуще: Животворче Всесильне Спасе, спаси ны Воскресением Твоим, Едине Человеколюбче.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Врата медная стерл еси, и верей сокрушил еси, Христе Боже, и род человеческий падший воскресил еси. Сего ради согласно вопием: воскресый из мертвых, Господи, слава Тебе.

Ины стихиры святых отец, глас 6

Стих: От стражи утренния до нощи, от стражи утренния, да уповаает Израиль на Господа.

Явися мира концем праотцев память, света истинно исполнена, и зарями благодати сияющи: Христос бо солнце светлое свыше просияв издалеча, звезд собор ведет, с ним возсиявший, и рождество Богочеловечное является внутрь Вифлеема быти. Вси убо верою сего рождество благочестно плещуще, ликуим хвалу предпразднственную.

Стих: Яко у Господа милость, и многое у Него избавление, и Той избавит Израиля от всех беззаконий его.

Явися мира концем праотцев память, света истинно исполнена, и зарями благодати сияющи: Христос бо солнце светлое свыше просияв издалеча, звезд собор ведет, с ним возсиявший, и рождество Богочеловечное является внутрь Вифлеема быти. Вси убо верою сего рождество благочестно плещуще, ликуим хвалу предпразднственную.

Стих: Хвалите Господа вси языцы, похвалите Его вси людие.

Славою украшаются Божественнаго причастия Адам радуяся днесь, яко основание и утверждение праотцев мудрых: совзыграет же Авель, и Енох веселится, и ликует Сиф, и Ное купно: с патриархи же поет Авраам всехвальный, и рождение без отца ныне Мелхиседек видит свыше. темже Божественную память Христовых праотцев и мы совершающе молим, спастися душам нашим.

Стих: Яко утвердися милость Его на нас, и истина Господня пребывает во век.

Облиста весело иже в пещи детей Богомудрых собор, и Христово Рождество проповедует на земли: яко бо честная роса низшед Господь, рождшую спасает неопальну, соблюдает непорочну, и обогащает Божественными дарованиями. темже и Богоприятный радуется Даниил веселяся, камень бо из горы несечен провидя яве, со дерзновением молится ныне о душах наших.

Слава, глас 6

Даниил, муж желаний, камень без руки отсечен видев Тя, Господи, младенца без семене рождена пронарече Тя, из Девы воплощенна Слова, неременнаго Бога, и Спаса душ наших.

И ныне, глас 4, Догматик:

Иже Тебе ради богоотец пророк Давид песенно о Тебе провозгласи, величия Тебе Сотворшему: предста Царица одесную Тебе. Тя бо Матерь, Ходатаицу Живота показа, без отца из Тебе вочеловечитися Благоволивый Бог, да Свой паки обновит образ, истлевший страстьми, и заблуждшее горохищное обрет овча, на рамо восприим, к Отцу принесет, и Своему хотению, с Небесными совоюпит Силами, и спасет, Богородице, мир, Христос имеяй велию и богатую милость.

Премудрость. Прости.

Свете тихий святых славы, Безсмертного, Отца Небесного, Святого Блаженного, Иисусе Христе! Пришедше на запад солнца, видевше свет вечерний, поем Отца, Сына и Святого Духа, Бога. Достоин еси во вся времена пет быти гласы преподобными, Сыне Божий, живот дай, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, *Господь воцарися, в лепоту облечеса.*

Стих: Облечеса Господь в силу и препоясася.

Стих: Ибо утверди вселенную, яже не подвижится.

Стих: Дому Твоему подобае святыня, Господи, в долготу дней.

Чтения паремий

Бытия чтение (глава 4):

Слышав Аврам, яко пленен бысть Лот, братаничъ его, сочте своих си домочадец триста и осмнадцать, и погна во след их даже до Дана. И нападе на ня нощию сам, и отроцы его с ним: и порази их, и гони их до Ховала, еже есть ошуюю Дамаска. И возврати всякаго коня содомскаго, и Лота братанича своего возврати, и вся имения его, и жены, и люди. Изыде же царь Содомский в сретение ему, повнегда возвратитися ему от сеча Ходоллогоморскаго, и с царьми, иже с ним, во удолю Савин: сие же бяше поле царево. И Мелхиседек, царь Салимский изнесе хлебы и вино, бяше же священник Бога вышняго. И благослови Аврама, и рече: благословен Аврам Богу вышнему, иже созда Небо и землю, благословен Бог вышний, иже предаде враги твоя под руки тебе.

Второго закона чтение (глава 1):

Во днех онех, рече Моисей к сыном Израилевым: видите, предах пред лицом вашим землю, вшедше наследуйте ю, юже клятса Господь отцем вашим, Аврааму и Исааку и Иакову дати им, и семени их по ним. И рекох к вам во время оно, глаголя: не возмогу един водити вас. Господь Бог ваш умножил вы есть, и се есте днесь, яко звезды Небесныя, множеством. Господь Бог отец наших да приложит вам, яко да будете тысящами сугубо, и да благословит вас, якоже глагола вам. И взял от вас мужи мудры, и сведомы, и смысленны, и поставих их владети над вами, тысященачальники, и стоначальники, и пятьдесятначальники, и десятначальники, и письмоводители судиям вашим. И заповедах судиям вашим, во время оно, глаголя: разслушайте посреде братьий ваших, и судите праведно, посреде мужа, и посреде брата его, и посреде пришельца его. Да не познаете лица в суде, малому и великому судиши, и не устыдишися лица человеческа, яко суд Божий есть.

Второго закона чтение (глава 8):

Во днех онех, рече Моисей к сыном Израилевым: се Господа Бога Твоего небо, и небо Небесе, земля и вся, елика суть на ней. Обаче отцы ваша произволи Господь любити их: и избра семя их по ним, вас, паче всех язык, в день сей. И обрежете жестокосердие ваше, и выя ваша не ожесточите ктому. Ибо Господь Бог ваш, сей Бог богов, и Господь господей: Бог великий, и крепкий, и страшный, иже не дивится лицу, ниже возьмет дар. Творяй суд пришельцу, и сиру, и вдовице, и любит пришельца, дати ему хлеб и ризу. И возлюбите пришельца, пришельцы бо бесте в земли египетстей. Господа Бога Твоего да убоишися, и Тому единому послужиши, и к нему прилепишися, и Именем Его кленешися. той хвала твоя, и той Бог Твой, иже сотворил ти есть великая и славная сия, яже видесте очи твои.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобае хвала. Тебе подобае пение, Тебе слава подобае, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

Господи, восшед на Крест, прадедную нашу клятву потребил еси, и сошед во ад, вечныя узники свободил еси, нетление даруя человеческому роду, сего ради поюще славим Животворящее и Спасительное Твое Востание.

Стих: Господь воцарися, в лепоту облечеса.

Повешен на древе, Едине Сильне, всю тварь поколебал еси: положен же во гробе, живущия во гробех воскресил еси, нетление и жизнь даруя человеческому роду. Темже поюще, славим тридневное Твое Востание.

Стих: Ибо утверди вселенную, яже не подвижется.

Людие беззаконнии, Христе, Тебе, предавше Пилату, распяти осудиша, неблагодарнии о Благодетеле явившеся. Но волею претерпел еси погребение: самовластно воскресл еси тридневно, яко Бог, даруя нам безконечный живот, и велию милость.

Стих: Дому Твоему подобает святыня, Господи, в долготу дней.

Со слезами жены дошедша гроба, Тебе искаху, не обретша же, рыдающа с плачем вопиюща глаголаху: увы нам, Спасе наш Царю всех, како украден был еси; кое же место держит Живоносное Тело Твое Ангел же к ним отвещаваше, не плачите, глаголет, но шедша проповедите, яко воскресе Господь, подая нам радость, яко Един Благоутробен.

Слава, отцев, глас 2

Радуйтесь, пророцы честнии, иже закон Господень добре учинивше, и верою явльшеся непобедимии столпи, и непреклоннии: вы бо и ходатаи явистеся новаго завета Христова, и преставльшеся к Небеси, того молити умирить мир, и спасти души наша.

И ныне, глас 2, Богородичен:

О чудесе новаго всех древних чудес! Кто бо позна мать без мужа рождшую, и на руку носящую, всю тварь Содержащаго Божие есть изволение Рождшееся. Егоже, яко Младенца, Пречистая, Твоима руками носившая, и Матернее дерзновение к Нему имущая, не престай молящи о чтущих Тя, ущедрити и спасти души наша.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святыи Боже, Святыи Крепкий, Святыи Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святыи, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь:

Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (дважды).

Тропарь святых отец, глас 2:

Велия веры исправления, во источнице пламене яко на воде упокоения, святии трие отроцы радовахуся: и пророк Даниил львом пастырь яко овцам являшеся. тех молитвами, Христе Боже, спаси души наша.

Буди имя Господне благословенно от ныне и до века (трижды).

Благословлю Господа на всякое время, выну хвала Его во устех моих.
 О Господе похвалится душа моя: да услышат кротцыи и возвеселятся.
 Возвеличите Господа со мною, и вознесем имя Его вкупе.
 Взысках Господа, и услыша мя, и от всех скорбей моих избави мя.
 Приступите к Нему, и просветитесь, и лица ваша не постыдятся.
 Сей нищий воззва, и Господь услышай, и от всех скорбей Его спасе и.
 Ополчится Ангел Господень окрест боящихся Его, и избавит их.
 Вкусите и видите, яко благ Господь: блажен муж, иже уповает Нань.
 Бойтесь Господа вси святии Его, яко несть лишения боящимся Его.
 Богатии обнищаша и взалкаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

**Слава в вышних Богу, и на земли мир, в человецех благоволение (трижды).
 Господи! устне мои отверзеши, и уста моя возвестят хвалу Твою (дважды).**

Шестопсалмие.

Псалом 3-й

Господи, что ся умножиша стужающии ми! мнози встают на мя; ...

Псалом 37-й

Господи! да не яростию Твоею обличиши мене, ниже гневом Твоим накажешо мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явился нам, благословен Грядый во имя Господне.

Стих: Исповедайтеся Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 4

Светлую Воскресения проповедь от Ангела уведевша Господни ученицы и праведнее осуждение отвергша, апостолом хвалящаяся глаголаху: испровержесе смерть, воскресе Христос Бог, даруяй миру велию милость. (дважды)

Слава, Тропарь святых отец, глас 2:

Велия веры исправления, во источнице пламене яко на воде упокоения, святии трие отроцы радовахуся: и пророк Даниил львом пастырь яко овцам являшеся. тех молитвами, Христе Боже, спаси души наша.

И ныне, Богородичен, глас 2:

Вся паче смысла, вся преславная Твоя, Богородице, таинства, чистоте запечатанной и девству храниму, Мати позналася еси неложна, Бога рождши Истиннаго; Того моли спастися душам нашим.

Чтение кафизм

**Господи помилуй Зр., Слава,
И ныне... читает кафизму в 3 Славы**

Малая ектения,

Паки и паки миром Господу помолимся...

По 1-м стихословии, седальны воскресны, глас 4

Возревша на гробный вход, и пламене ангельскаго не терпяща мироносицы, с трепетом дивляхуся, глаголюща: егда украдеса отверзый разбойнику рай; еда ли воста, Иже и прежде страсти проповедавый востание; воистинну воскресе Христос, сущим во аде подавая живот, и воскресение.

Стих: Воскресни Господи Боже мой, да вознесетя рука Твоя, не забуди убогих Твоих до конца.

Вольным Твоим советом Крест претерпел еси, Спасе: и во гробе нове человецы положиша Тя смертнии, словом концы составльшаго. Темже связан бысть чуждий: смерть люто пленяшеса, и сущии во аде вси взываху живоносному востанию Твоему: Христос воскресе, Жизнодавец пребываяй во веки.

Слава, и ныне, Богородичен:

Удивися Иосиф, еже паче естества зря, и внимаше мыслию иже на руно дождь, в безсеменном зачатии Твоем, Богородице, купину огнем неопалимую, жезл Ааронов прозябший, и свидетельствуя обручник Твой и хранитель, священником взываше: Дева раждает, и по рождестве паки Дева пребывает.

Господи помилуй Зр., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 4

Воскресл еси яко Безсмертный от гроба, Спасе, совоздвигл еси мир Твой силою Твоею, Христе Боже наш, сокрушил еси в крепости смерти державу, показал еси, Милостиве, воскресение всем: темже Тя и славим, Едине Человеколюбче.

Стих: Исповемся Тебе Господи всем сердцем моим, повем вся чудеса Твоя.

С горних высот сошед Гавриил, и к камению приступль, идеже Камень жизни, белоносый взываше ко плачущим: престаните вы от рыдания вопля, имеющие и ныне милостивное: Егоже бо ищите плачуща, дерзайте, яко воистинну востал есть. Темже возопийте апостолом: яко воскресе Господь, Воставшему поклонитесь радость приемша. Дерзайте убо, да дерзает убо и Ева.

Слава, и ныне, Богородичен:

Удивишася Чистая, вси ангелов лица таинству Твоего рождения страшному: како Иже вся содержай манием едином, объятии Твоими яко человек содержавается, и приемлет начало Превечный и млеко питается, Иже всякое дыхание питаяй неизреченною благостию; и Тя, яко воистинну Божию Матерь хваляще, славят.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живой во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистайся во гробе Ангел мироносицам вещаше: видите вы гроб и уразумейте: Спас бо воскрес от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцыте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскрес от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 4

Яже Твоего преславнаго востания, предтекша мироносицы, апостолом проповедаху Христе, яко воскресл еси яко Бог, подая миру велию милость.

И седален отцев, глас 8

Авраама, Исаака же и Иакова восхвалим вси песенно, Давида кроткаго, Иисуса, и дванадесять патриархи, вкупе с тремя юношами, угасившими огненный пламень силою духовною: радуйтеся, вопиюще к ним, прелесть доблественне обличивше царя безумнаго: и Христу молитесь, согрешений оставление даровати празднующим любовию святую память вашу.

Слава и ныне, Богородичен

Благодарственное похваление должно, якоже вдовица оная два лепта, приношу тебе, Владычице, о всех дарованиях твоих: ты бо явилася еси покров купно и помощь, напастей и скорбей присно мя изымающи. темже яко от среды горящих пещи избавлься оскорбляющих мя, от сердца взываю тебе: Богородице, помози ми, молящи Христа Бога, прегрешений оставление дати мне: ты бо имею надежду раб твой.

Малая ектения

Паки и паки миром Господу помолимся.

Степенна, глас 4

Антифон 1

От юности моя мнози борют мя страсти, но Сам мя заступи, и спаси, Спасе мой.

Ненавидящии Сиона, посрамитесь от Господа, яко трава бо огнем будете иссохше.

Слава: Святым Духом всяка душа живится, и чистотою возвышается, светлеется Троическим Единством священнотайне.

И ныне, тойже.

Антифон 2:

Возвах Тебе Господи тепле, из глубины души моя, и мне да будут на послушание Божественная Твоя ушеса.

На Господа надежду всяк кто стяжав, вышший есть всех скорбящих.

Слава: Святым Духом точатся благодатныя струи, напаяюща всяку тварь ко оживлению.

И ныне, тойже.

Антифон 3:

Сердце мое к Тебе, Слове, да возвысится, и да ничтоже усладит мя от мирских красот на слабость.

К матери своей якоже иматъ кто любовь, ко Господу тепльше люблением должны есмы.

Слава: Святым Духом боговедения богатство, зрениа, и премудрости: вся бо в сем отеческая веления слово открывает.

И ныне, тойже.

Прокимен, глас 4: Воскресни, Господи, помози нам и избави нас имене Твоего ради.

Стих: Боже, ушима нашима услышахом, и отцы наши возвестиша нам.

Господу помолимся — **Господи помилуй**— Яко Свят еси Боже наш... **Аминь**.

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — **Господи помилуй**

Зр

Мир всем - **И духови твоему.**

От (Матфея или Марка или...) Святаго Евангелия чтение **Слава Тебе, Господи, слава Тебе.**

Чтение Евангелия.

Слава Тебе, Господи, слава Тебе.

Воскресение Христово видевши, поклонимся Святому Господу Иисусу, единому безгрешному. Кресту Твоему покланяемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Молитвами апостолов, Милостиве, очисти множества согрешений наших.

И ныне и присно и во веки веков, аминь. Молитвами Богородицы, Милостиве, очисти множества согрешений наших.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Воскрес Иисус от гроба, якоже прорече, даде нам живот вечный и велию милость.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единородного Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — **Аминь.**

Канон воскресный. Глас 4

Песнь 1

Ирмос: Моря чермную пучину невлажными стопами древний пешешествовав Израиль, крестообразными Моисеовыми руками Амаликову силу в пустыни победил есть.

Вознеслся еси на пречистем древе крестнем, наше отпадение исправляя, еже на древе исцеляя всегубительство, Владыко, яко Благ и Всесилен.

Во гробе плотски, во аде же с душею, яко Бог: в раи же с разбойником, и на Престоле был еси, Христе, со Отцем и Духом, вся исполняя Неописанный.

Богородичен: Без семени Отчею волею от Божественного Духа Божия зачала еси Сына, и плотию родила еси: Иже из Отца без матери, нас же ради, из Тебе без отца.

Ин канон Крестовоскресен. глас 4,

Исцелил еси сокрушение человечества, Господи, Божественною Твоею Кровию обновивый то: и сокрушил еси сильного в крепости, иже древле сокрушившаго Твое создание.

Мертвых востание, умерщвлением был еси: крепость бо отъяты умерщвления, бравшия с Жизнию вечною, Иже всеми владычествующу воплощенному Богу.

Ин канон Пресвятей Богородице, глас 4

Сотрясошася людие, смятошася языцы, царствия же державная уклонишася, Чистая, от страха рождества Твоего: прииде бо Царь мой, и низложи мучителя, и мир от тли избави.

Жилище Свое, живой в вышних, к человеку сошед, освяти Христе, и непоколебимо яви: Едина бо по рождестве девства сокровище, Зиждителя рождши пребыла еси.

Ин канон святых отцев, глас 1

Днесь собор Божественных отец Христова рождество предпразднует светло, и прописует сие преславная благодать: Авраам бо образ закона, и отроцы суть.

Древле приемлет Божество едино триипостасное священный Авраам, ныне же сопрестольное Слово Отчее, Божественным Духом к детям приходит, славно восхваляемое.

Числом и верою Божественныя Троицы безбожие низвергше, в пещи дети образы чувственными, сокровенныя Божия тайны миру проявиша.

Авраам избавися от руки неправедныя, пламене же пещнаго Божественнии отроцы иногда, и Даниил пророк от зверей и рова спасеся. темже ныне рождество Христово предпразднуем.

Богородичен: Обрадованная безвестная Мати, Дево нетленная, блажим тя: ибо от рода авраамля, и племени давидова процвела еси: Христа же родила еси, пророки проповеданнаго прежде.

Катавасиа: Христос рождается — славите! Христос с Небес — срящите! Христос на земли — возноситеся! Пойте Господеви, вся земля, и веселием воспойте, людие, яко прославися.

Песнь 3

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище, и утверждение.

Древо животное, мысленный истинный виноград, на Кресте висит, всем источая нетление.

Яко велик, яко страшен, яко адово низложь шатание, и яко Бог нетленен, ныне плотски воскресе.

Богородичен: Ты едина сущим на земли, яже паче естества благих Ходатаица, Мати Божия была еси: темже Ти, радуйся, приносим.

Ии

Ядом исполнены в мя змий зубы вонзе, Спасе, яже, Вседержителю Владыко, гвоздьми рук Твоих сокрушил еси: яко несть свят во святых, паче Тебе, Человеколюбче.

Виден был еси, Человеколюбче, волею во гробе мертв, Животворче, и врата развергл еси адова, яже от веков душам: яко несть свят во святых разве Тебе, Человеколюбче.

Ии

Очищается человек существо, Тобою присовокупльшееся нестерпимому Божественному Огню: яко сокровенный, Пречистая Дево, в Тебе Хлеб испекшееся, Иже и Тебе неврежденно сохранишему.

Кая сия яже воистинну близ Бога; яко превозшедши вся ангельския чины, едина добротою девства, яко Мати сияющи Вседержителя.

Ии

Юже по образу славу, и по подобию Божию верно соблюдающе, златаго образа пламень огнем духовным страдальчески угасиша отроцы, поюще: единого Господа знаем.

Мудростию обложени и Духа силою отроцы, мудрецы вавилонския пленении посрамиша, и дерзостне взываху: несть свят, разве тебе, Господи человеколюбче.

Радуется и сликовствует с детьми и пророки закон и предыграет Господню Божественному пришествию днесь: и Авраам радуется, яко от семени его виде Господа воплощаема.

Богородичен: Зачатие без страсти, приятие паче слова пройде, рождества твоего, Богородице: пророки бо проповеданное, паче естества таинство, нам явился, слово Божие, сый Бог.

Катавасиа: Прежде век от Отца рожденному нетленно Сыну и в последняя от Девы воплощенному безсеменно, Христу Богу возопиим: вознесый рог наш, Свят еси, Господи.

Малая ектения.

Паки и паки миром Господу помолимся...

Ипакои отцев, глас 8

Ангел отроков ороси пещь, ныне же жен плачь разреши, глаголя: что приносите мвра кого ищите во гробе воста Христос и Бог: есть бо жизнь и спасение рода человеческого.

Песнь 4

Ирмос: Вознесена Тя видевши Церковь на Кресте, Солнце Праведное, ста в чине своем, достойно зывающи: слава силе Твоей, Господи.

Возшел еси, страсти моя исцеляя, на Крест страстию Пречистыя плоти Твоея, в нюже волею облеклся еси. Темже Ти зываем: слава силе Твоей, Господи.

Безгрешнаго смерть вкусивши, Животворящаго Тела Твоего, достойно, Владыко, умертвися: мы же вопием Ти, слава силе Твоей, Господи.

Богородичен: Неискусобратно родила еси, Дево, и по рождестве явилася еси девствующи паки: темже немолчными гласы, еже радуйся, Тебе, Владычице, верую несумненною зываем.

Ии

Взаконен сый Израиль, Тебе, Христе, взаконившаго Бога не позна: но яко беззаконника, законопреступая, на Кресте пригвозди, иже законоположению недостойный.

Обожена Твоя, Спасе, Душа, адова сокровища пленивши, яже от века совоскреси души: живоносное же Тело всем нетление источи.

Ии

Поживе с человеки, видимъ бывъ Невидимый, во зраце сый Непостижимаго Божества, и воображься из Тебе, Отроковице, в чуждее, ведущих Тя, Чистую Богоматерь, спасает.

Прият в вещественне Дева Невещественнаго, в причастии вещества, Младенца от Нея бывша. Темже во дву существу, Един познавается плотоносец Бог, и Человек Пресущественный

Ии

Отцев начаток Авраама, Исаака и Иакова почтим, яко из тех семени возсия Христос, воплощся из Девы, яко всесилен.

Прописуяй будущая сошествию Христову Даниил, звери яко овцы показа всем яве: провиде бо будущее, яко пророк Божий.

Греховным не привлечени ядом, от пламене избавистесь, дети: злата бо чистейше суще мудрии, в печи прелести не слияшася.

Богородичен: Велегласно проповедуется ожидание языков, и спасение мира, паче естества рождество твое, пречистая, честная: егоже поет отеческая память днесь.

Катавасиа: Жезл из корене Иессеова и цвет от него, Христе, от Девы прозябл еси, из горы, Хвальный, приосененныя чаши пришел еси, воплощся от Неискусомужныя, Невещественный и Боже. Слава силе Твоей, Господи.

Песнь 5

Ирмос: Ты, Господи мой, Свет в мир пришел еси, Свет Святыи, обращаи из мрачна неведения верою воспевающия Тя.

Ты, Господи, к земли милостивно сошел еси: Ты вознесл еси падшее человеческое существо, на древе воздвигаемъ.

Ты, Господи, к земли милостивно сошел еси: Ты вознесл еси падшее человеческое существо, на древе воздвигаемъ.

Богородичен: Тя оружие непобедимое на враги предлагаем, Тя утверждение, и надежду нашего спасения, Богоневесто, стяжахом.

Ии

Прият Тя всего усты ад безумный: на Кресте бо пригвождена Тя виде, копием прободена, бездыханна, Живаго Бога проста вменияше человека. Разуме же искусый крепость Твоего Божества.

Разрушенный, Человеколюбче, Храм Твоего Телесе, гроб разделивый и ад неволю оба суда истязуеми суть: ов убо святых Твоих души, телеса же другий соотсылающе, Безсмертне.

Ии

Дом Тя славы, Гору Божию Святую, Чистая, Невесту, Чертог, Храм освящения, Сын Божий, в Тя вселився, и рай сладости присносущныя нам содела.

Плоть от крове Девственныя приял еси, Христе, Безсеменну, Пречисту, Ипостасну, и словесну и умну, одушевленну, действенну, хотетельну, Самовладычну и Самовластну.

Ии

Отцев начаток, яко началовождя закона и благодати, от рода авраамля днесь Даниила Божественнаго почтим: яко пророк бо Божий предвозвести Христа от Девы, и сего предусретае Божественное рождение.

Прописавше ясно к нам Господне пришествие ангеловым сошествием, угасиша авраамстии отроцы пещь: и тучеросен огонь соделавше, в сем верою образа златаго славу изнуриша.

Загради уста зверей даниил в рове Духом: огненную же крепость угасиша авраамстии отроцы благодатию, и спасшеся сии от тли, предвозвещают Христа из Девы, моляще яко избавителя спасения нашего.

Богородичен: Божественным Духом являя, о нас безстрастно твое приятие, исаиа вопияше, Господи, бодрствуя законом благодати от рода убо авраамля, от племени же иудова по плоти Дева без семени грядет раждаючи.

Катавасиа: Бог Сый мира, Отец щедрот, Великаго Совета Твоего Ангела, мир подавающа, послал еси нам; тем, Богоразумия к свету наставляшесе, от ноши утреннюю, славословим Тя, Человеколюбче.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися ради милости от ребр Твоих истекшею Кровию.

Возшел еси на Крест, силою препоясався, и соплется с мучителем, яко Бог, с высоты свергл еси, Адама же непобедимую силою воскресил еси.

Воскресл еси блистайся красный из гроба, Христе, и разгнал еси вся враги Божественною силою Твоею, и вся, яко Бог, веселия исполнил еси.

Богородичен: О чудо всех чудес новейшее! Яко Дева во утробе, всяческая обдержавшаго неискусомужно зачещи, не тесновмести.

Ии

Отверзе гортань свой ад, и пожре мя, и душу разшири безумный: но Христос сошед, возведе жизнь мою, яко Человеколюбец.

Погибе смертию смерть, умерый бо воскресе, нетление мне даруя: явлься же женам провеща радость Безсмертный.

Ии

Древле убо прельсти мя змий, и умори мя, праматерию моею Евою: ныне же, Чистая, Тобою создавый мя из истления воззва.

Бездна Тя бездну неизреченно, благоутробия Отроковице, избранную показа чудес: ибо из Тебе молниєю Божества, бисер Христос возсия.

Ии

Нрав страннолюбив, вера же высока Авраама суща праотца: темже Божественное таинство образне прием радовашесе, пред Христом же текий ныне веселится.

Тварь повину ныне вера отроком, даром зиждителя: огонь бо всеядец и безстудный устыдесе чтущих огня делателя Иисуса Христа.

Мира свирепство пришествием Христовым сочислятися изъяви, к миру глубокому Боголепно, заградив уста львов Даниил пророк в рове иногда.

Богородичен: Из ложесн родила еси девственных Христа, марие Мати безмужная, егоже пророцы видевшие духовне, того предликовствуют ныне отцы рождественная.

Катавасиа: Из утробы Иону младенца изблева морской зверь, якова прият; в Деву же всельшесе Слово и плоть приемшее пройде, сохраншее нетленну: Егоже бо не пострада истления, Рождшую сохрани неврежденну.

Малая ектения.

Паки и паки миром Господу помолимся...

Кондак отцем глас 6:

Рукописаннаго образа не почетше, но неописанным существом защитившесе, треблаженнии, в подвизе огня прославистесе: среде же пламене нестерпимаго стояще, Бога призвасте: ускори, о щедрый! и потщися, яко милостив, в помощь нашу, яко можеша хотяй.

Икос:

Простри твою руку, еуже древле прияша искушение египтяне борющии и евреи боримии, не остави нас, да не пожрет нас смерть жаждущая нас, и сатана ненавидяй нас: но приближися нам, и пощади души наша, якоже пощадил еси иногда отроки твоя, сущия в вавилоне, непрестанно славящия тя, и вверженныя тебе ради в пещь, и от сея вопиющия ти: ускори, щедрый, и потщися, яко милостив, на помощь нашу, яко можеша хотяй.

Ирмос: В печи Авраамстии отроцы персидстей, любовию благочестия паче, нежели пламенем, опалаеми, взываху: благословен еси в храме славы Твоея, Господи.

К нетлению человечество призвася, Божественною измовено Кровию Христовою, благодарно воспевающее: благословен еси в храме Славы Твоея, Господи.

Яко Живоносец, яко рая краснейший воистинну, и чертога всякаго царскаго показася светлейший, Христе, гроб Твой, источник нашего воскресения.

Богородичен: Вышняго освященное Божественное селение, радуйся, Тобою бо дадеся радость, Богородице, зовущим: благословена Ты в женах еси, Всенепорочная Владычице.

Ин

Смирил еси на древо воздвигаемь, око высокое, и превознесенную бровь на землю низложил еси, спасый человека: Препетый отцев Господь и Бог, благословен еси.

Силою Твоею рог наш возвыси служащих Ти, воскресый из мертвых, и адово истощивый прежде многочеловечное богатство, Владыко: Препетый отцев Господь и Бог, благословен еси.

Ин

Привлечит мя к пению любовь девственная огонь, иже в сердцах, вопити Матери и Деве: Благословенная, Господь силам с Тобою.

Превышши твари явилася еси, яко Творца рождши и Господа. Темже Ти вопию, Богородице: Благословенная, Господь силам с Тобою.

Ин

Христа родив по плоти, верою, родоначальниче отче Аврааме, явился еси языков духом отец яве, во спасение нас поющих: избавителю Боже, благословен еси.

Бездушнаго шума вотще восклицающаго, одушевленных посрами песнь: пещь бо огнем горящую телесы попирающе отроцы неврдно, избавителю поют: Боже, благословен еси.

Видением воззрев духовным пророк древле Даниил, Христово яви второе пришествие, и яже в нем страшная предвозвещает, вопия: избавителю Боже, благословен еси.

Богородичен: Странное чудо во пророцех повествуемое, и отцем древле явленно, Дева чистая родити хотящи прииде, на спасение нас песнопющих: избавителю Боже, благословен еси.

Катавасиа: Отроцы, благочестию совоспитани, злочестиваго веления небрегше, огненнаго прещения не убоюшася, но, посреди пламене стояще, пояху: отцев Боже, благословен еси.

Песнь 8

Ирмос: Руце распростер Даниил, львов зияния в рове затче, огненную же силу угасиша, добродетелию препоясавшеся, благочестия рачители, отроцы, взывающе: благословите, вся дела Господня, Господа.

Руце распростер на Кресте, языки вся собрал еси, и едину явил еси, Владыко Церковь воспевающую Тя, земную и небесную, согласно поющим: благословите вся дела Господня, Господа, пойте и превозносите Его во веки.

Белообразен явился женам, неприступным светом воскресения блистайся Ангел, что Живаго во гробе, вопия, ищите яко мертва; воистинну воста Христос, Емуже вопием: вся дела пойте Господа, и превозносите во вся веки.

Богородичен: Ты Едина во всех родех, Дево Пречистая, Мати явилася еси Божия: Ты Божества была еси жилище, Всенепорочная, не опальшися огнем Неприступнаго Света. Темже вси Тя благословим, Марие Богоневесто.

Ии

Неправедное видящи закление Твое тварь, омрачающися рыдаше: земли бо смущающейся, во мрак, яко в ризу черну солнце облечешя: мы же Тя непрестанно поем, и превозносим, Христе, во веки.

Сшедый ко мне даже до ада, и всем путесотворивый воскресение, паки возшел еси, взем мя на раму Твоею, и Отцу привел еси. Темже зову Ти: Господа пойте дела, и превозносите во вся веки.

Ии

От ребра Адамова создавый Тя, от Твоего девства воплотися, Иже всех Господь, Егоже поюще, вопием: вся дела благословите, пойте Господа, и превозносите Его во веки.

В сени Авраам узре, еже в Тебе, Богородице, таинство, Сына бо Твоего Безплотнаго прият, поя: вся дела благословите, пойте Господа, и превозносите Его во веки.

Ии

Твое закление предызобразуя Авраам, Христе, егоже роди сына, на горе повиная тебе, Владыко, якоже овча, взыде пожрети хотяй верою: но возвратися радуяся с ним, и славя и превознося тя избавителя мира.

Пламенем неутружденным, Христе, облечену ти яко ризою Божественною, огонь святых отрок твоих угаси зело, и роса твоим низхождением поющим шумяше. священницы пойте, и превозносите его во веки.

Дается львом в снедь судом неправедным пророк Даниил, но имяше, повелением воздержания, спостники благочестно звери бо глубине ровища: того молитвами, Авраама же и отроков, спаси в мире, Христе, поющия тя.

Богородичен: Егоже провозвестиша верно пророчестии гласи, Иисуса Еммануила, в человечесте образе грядуща, Божия и Отча, Сына же и Собезначальное Слово, от Духа Святаго Дева Мария раждает неискусомужно в Вифлееме граде.

Хвалим, благословим, покланяемся Господеви, поюще и превозносяще во вся веки.

Катавасиа: Чуда преестественнаго росодательная изобрази пещь образ: не бо, яже прият, палит юныя, яко ниже огонь Божества — Девы, в Нюже вниде утробу. Тем, воспевающе, воспоем: да благословит тварь вся Господа и превозносит во вся веки.

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатящияся отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Камень нерукосечный от несекомыя горы Тебе, Дево, краеугольный отсечешя, Христос, совокупивый разстоящаяся естества. Тем веселящешя Тя, Богородице, величаем.

Всего мя восприят еси весь в совокуплении неслитно, всему ми дая, Боже мой, Спасение страстию Твоею, юже на Кресте претерпел еси телесне, благоутробия ради многого.

Твои ученицы зряще отвержен гроб Твой, и богоносныя плащаницы испражнены воскресением Твоим, с ангелом глаголаху: воистинну воста Господь.

Троицен: Единице убо Божественнаго Существа, но Ипостасьми Троице, вси вернии покланяющиеся, в неслиянных Ипостасех Равносильную Единочестную ныне благочтуще величаем.

Ии

Льстивно пополз змий, из Едема поят мя, пленена: на краниевем же твердем камени разби сего Вседержитель Господь, якоже младенца: и сладости паки мне вход древом крестным отверзе.

Положил еси крепкия вражия твердыни ныне в запустение: всесильнейшею же рукою богатство Его расхитил еси из истощаний адовых совоскресивый мя, Христе, и древле безмерно хвалящагося яко смех ругаема явил еси.

Ии

Зрим яко крин Тя, ризою обагренною украшену, Пречистая, Божественнаго Духа, посреде терния сияющую, и благоухания исполняющую, иже Тебе искренно величающих.

Тленное приим человеческое естество из Твоего, Всенепорочная, чрева Нетленный, в Себе показа нетленно, за благоутробие: темже Тя, яко Богородицу, величаем.

Ии

Сущих прежде закона отцев праздник совершающе, от них Боголепно почтим Христа: Авраам бо, купно и Исаак и Иаков, пророков и закона явишася основание, и благодати верою Духа проповедницы..

Огнем показавый Моисею в купине, паче ума боговидне таинство Бог: во огонь к детем низшед тойже, огнем естественным Божества его, пещный пламень росу показа.

Со Авраамом сошедшеся пресвятии дети, и Даниил дивный пророк Божий, Исаак и Иаков, с Моисеем и Аарон, Христова прежде рождества ликовствуют верно, молящеся непрестанно во еже спастися нам.

Богородичен: Срадуется вся тварь твоему рождеству, Дево: Едема бо Вифлеем отверзе нам. и се древа жизни вси наслаждающиеся верно, вопием прилежно, молитвы наша, Владычице, исполни.

Катавасиа: Таинство странное вижу и преславное: Небо — вертеп, престол Херувимский — Деву, ясли — вместилище, в нихже возлеже Невместимый — Христос Бог, Егоже, воспевающе, величаем..

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 7:

Яко взяша Господа, Марии рекшей, на гроб течаства, Симон Петр, и другой таинник Христов, егоже любляше: течаства же оба, и обретоста плащаницы едины внутрь лежаща, и главный же бе сударь кроме их. Темже паки умолчаства, дондеже Христа видеста.

Слава - светилен отцев:

Патриархов избраннии, и прежде закона отцы верою предвозсияша, Авраам, Исаак же и Иаков, яко светильницы: вси бо пророцы и праведницы возсиявша от них, яко свечи световидныя, и тварь всю лучами просветиша честнаго пророчества, и прилежно молятся к Богу о мире.

И ныне, Богородичен:

Агница нескверная, Агница рождшая Слова пребезначальнаго в последняя времена, бяше сие чудно, Адамова внука и Давидова по достоянию: еяже несказанное рождество отцев множество предпразднствует достойно.

Глас 4. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 4:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Крест претерпевый и смерть, и воскресый из мертвых, Всесильне Господи, славим Твое Воскресение.

Стих: Хвалите Бога во святых Его, хвалите Его во утверждении силы Его.

Крестом Твоим, Христе, от древняя клятвы свободил еси нас, и смертью Твоею естество наше мучащаго диавола упразднил еси: востанием же Твоим радости вся исполнил еси. Темже вопием Ти: воскресый из мертвых, Господи, слава Тебе.

Стих: Хвалите Его на силах Его, хвалите Его по множеству величества Его.

Твоим Крестом, Христе Спасе, настави нас на истину Твою, и избави нас от сетей вражиих, воскресый из мертвых, возстави ны падшыяся грехом, простер руку Твою, Человеколюбче Господи, молитвами святых Твоих.

Стих: Хвалите Его во гласе трубнем, хвалите Его во псалтири и гуслех.

Отеческих Твоих недр не разлучився, Единородный Слове Божий, пришел еси на землю за человеколюбие, Человек быв непреложен, и крест и смерть претерпел еси плотию, безстрастный Божеством: воскрес же из мертвых, бессмертие подал еси роду человеческому, яко Един Всесилен.

Отцам, глас 5

Стих: Хвалите Его в тимпане и лице, хвалите Его во струнах и органе.

Возвыси твой глас истинно, сионе, Божественный граде, и проповеждь отцев Божественную память, со Авраамом Исаака и Иакова почитающе приснославнаго, се со Иудою и Левием величаем Моисеа великаго, и Аарона чуднаго, и почитаем с Давидом Иисуса, и Самуила вси. предпразднеству Христову Божественную похвалу песнями Божественными плещуще, яже от него благодать улучшить просим, и миру даровати велию милость.

Стих: Благословен еси, Господи Боже отец наших, и хвалю, и прославлено Имя Твое во веки.

Гряди, на огненную иногда возседый, илие, Божественную колесницу, и Богомудре Елисее, со Езекиею во едино, Осие, купно срадитесь: честная же двоенадесятице пророков Богодохновенная, рождеству Христову сликовствуйте, и в песнях вси праведнии воспойте, отроцы всеблаженнии, росую Духа угасившии пламень пещный, о нас молитесь Христа, низпослати душам нашим велию милость.

Стих: Яко праведен еси о всех, яже сотворил еси нам.

Явися, яже от века на земли проповедаемая пророки в вещаниих, Дева Богородица: юже патриарси мудрии, и праведных собори возвещают, с ними же сликовствует и жен благолепие: Сарра, Ревекка, Рахиль, и Анна же, и славная Мариам Моисеева купно. с сими срадуются и мира концы, вся тварь почитает, яко зиждитель всех и Бог приходит плотию родитися, и даровати нам велию милость.

Слава, глас 8

Законных учений сословие во плоти являет Христово Божественное рождество, прежде закона благодать благовествующия, яко паче закона в вере сущия: темже тления изменению сущу ходатайственно, во аде держимым душам предпроповедаху воскресения ради: Господи, слава тебе.

Преблагословенна еси Богородице Дево, воплощшим бо ся из тебе ад пленися, Адам возвася, клятва потребися, Ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемтися, славословим Тя, благодарим Тя великия ради славы Твоея.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отче, вземляи грехи мира, помилуй нас.

Вземляи грехи мира, приими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегох: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святыи Безсмертный, помилуй нас. Святыи Боже, Святыи Крепкий, Святыи Безсмертный, помилуй нас!

Тропарь воскресный

Воскрес из гроба и узы растерзал еси ада, разрушил еси осуждение смерти, Господи, вся от сетей врага избавивый; явивый же Себе апостолом Твоим, послал еси я на проповедь, и теми мир Твой подал еси вселенней, Едине Многомилостиве.

сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак “Взбранной Воеводе” или празднику.